

四庫全書

集部

欽定四庫全書

集部

五百家播芳大全文粹卷四上

中

詳校官編修臣謝振定

助教臣常循履勘

總校官編修臣王燕緒

校對官中書臣范鏊

謄錄監生臣周炯

欽定四庫全書

五百家播芳大全文粹卷四上

宋 魏齊賢

葉 棻同輯

謝授除表

中書舍人 翰林學士

謝除中書舍人表

曾子固

甫上程扁遽塵寵任載惟遭遇倍集兢慙 中謝 蓋聖君

難論之情將欲施于號令得當世能言之士然後達于文詞矧今綱理四方彌綸庶政肇維新之王度備久簡之官儀計謀常越于拘攣注措舉為于希濶豈伊凡庶可測高深方當覺悟邇遐使遍知于上意訓齊内外用丕變于羣心尤資演暢之才曲盡丁寧之旨布為邦典茲謂人文顧在臣愚豈堪此選伏遇皇帝陛下超逾千載特起一時躬堯舜之聰明而不忘講學集成湯之智勇而無勅咨詢惟左右前後之臣有耳目腹心之寄尤

非淺識所可叨居如臣性實滯蒙器非廣博知自強于  
名節恥陰附于貴權無因緣毫髮之扳援有積累丘山  
之忌嫉晚逢睿聖獨賜收憐褒嘉特異于常倫進用每  
從于中出猥以五朝之大典屬于一介之孤生已媿缺  
然將安稱此敢期誤寵仍寘近班敷導訓詞懼空疎之  
難強追參諷議憂蹇淺之易窮于風波流落之餘以蒲  
柳衰殘之質自循涯分曷副恩榮雖日月之光何加于  
潤色而天地之德無待于論思然臣素堅好古之誠粗

識愛君之義既抗顏而就列敢恕已以懷慙謹當尋繹  
舊聞冀闡揚于名命激昂懦志庶補助于謀猷仰答主  
知誓殫臣節

謝除中書舍人表

蘇子瞻

右史記言已塵高選西垣視草復玷近班皆儒者之至  
榮豈平生之所望中謝竊以詞命之職古今所難非獨  
取之于文蓋將試之以事至于機務亦或與聞雖四貴  
擅權非當時之公議而五花判事亦前代之美談爰及

三字之除乃是一切之政但謂內朝之法從安知宰相之屬官既任止于訓詞故權移于胥史恬不知怪習為故常先皇帝道冠百王法垂萬世建六官而脩故事闢三省以待異人典章一新名實皆正遂申明于四禁俾分領于六曹遠則迨直閣之司近則通檢正之任雖未聞政而聞事蓋須有德而有言如臣之愚無一而可草創潤色既非鄭國之材除書德音又乏唐人之譽忽當此選莫測其由此蓋皇帝陛下將聖與仁能哲而惠雖

在三年不言之際已有十日並照之光而臣日侍邇英親聞訪道仰天威之甚近知聖鑒之難逃謂臣嘗受先朝之知實無左右之助棄瑕往昔責效將來臣敢不益勵素心無忘舊學上體周公煩悉之誥助成漢家深厚之文苟無曠官其敢言報

謝除中書舍人表

鄭僑

載筆螭坳未酬親擢演綸鳳閣遽冒超除內量寒陋之姿仰玷邇嚴之選避辭不獲震惕靡寧臣中謝伏念臣



頃由膠庠辱賜科第佐外藩而入館甫閱四年奉中詔  
以乘軺殆經一紀曾蔑微勞之補報但驚末學之荒蕪  
顧簡在于宸衷復召還于宣室叨塵錦被敢云掌奏于  
南宮俯結絲絢更冒記言于右陛兼管瑣闥攝事披垣  
屢獻狂愚悉蒙開納惟是五花之判與夫三字之除必  
識見高明乃可救朝廷之闕失非詞章溫厚豈能司號  
令之廢弛如臣迂踈涉道蹇淺既非游夏淵源之學又  
無卿雲黼黻之文承乏幾何方切越俎代庖之愧即真

太驟愈深汗顏血指之慙蟠木孰為之先容秋毫皆出于  
帝力茲蓋伏遇皇帝陛下參稽古道丕變人文覽萬化  
而獨觀其原刑四方而不匿厥指雖諒陰恭默帝自賚  
于代言而潤色討論臣何裨于為命思歸獨斷望過平  
生臣敢不思稱所蒙益堅厥守謀猷可告願資海岳之  
高深言語雖微或助風雷之鼓舞

謝除中書舍人表

胡文定

屢貢忱辭謂難就列終頌成命有愧冒恩觀訓誥之所

蒙豈冥頑之能稱中謝竊以身居近侍日奉內朝典堂  
替書亦貴語言之妙與聞政事尤資獻納之忠自非才  
擅國華識通世務忠信守勿欺之節端方微患失之心  
何以備職詞臣叅禁法從臣稟資昧陋承學荒蕪冠歲  
影纓初動顏于義檄中年解紱審安膝于陶廬靜陪鷗鷺  
之羣夢絕鴛鴦之侶值聖德龍興于寶位而才賢鶚翥  
于煙霄不虞澤國之垂綸偶被天衢之推轂拂塵冠于  
壁上更欲激昂視絲髮于鑒中已驚衰晚強辭陋巷遠

望脩門初獲對敬未輸丹赤親承寵擢即預論思自憐  
羈遯之蹤倍費保全之力言雖危而無罪思至大而莫  
酬茲蓋伏遇皇帝陛下量等乾坤明齊日月惜人才之  
難得念疎賤之易凌獨賜主張俾圖補報而臣深慙弱  
植久負沉疴方邊鄙之繹騷屢文書之填委分曹押事  
必藉精明養疾便私豈逃瘵曠幸睿慈之洞照當免後艱  
兼聖造之曲成俯從前請倘殄陰陽之寇別申糜殞之  
期

謝除中書舍人表

蘇子由

執筆柱下已愧空疎起草禁中尤為清切上慙主眷下媿人言中謝伏以西臺政教之原紫薇論思之地緝熙庶政事得稽參進退具察言成訓誥昔趙孟治晉叔向為之謀主則楚無以當國僑為鄭子羽掌其詞今則國鮮敗事今臣所領頗近于斯宜得博達詳練之人疏通敏捷之士考覈邦典潤飾皇猷如臣樸訥少文迂拙自用在仁祖時始以直言見收下第在神考時復以封

事獲對清光不能自結于一時旋復竄投于萬里雖謀身之不暇顧受任以何堪泰壇之樽何取溝中之斷清廟之瑟誤收竈下之焦此蓋伏遇皇帝陛下出震乘龍代天理物默然思道專意以用人穆若守成選衆而求舊憐臣一介之賤偶為三世之陳遺簪以故而見收老馬以病而復養不求其用聊廣吾仁臣縱力不逮人而誠心未泯學忘其舊而一二猶存敢不靖恭于朝側聽高宗之言政勉強以俟幾見成王之措刑

謝除知制誥表

王介甫

高華之選欲報嘗艱固陋之身以榮為懼

中謝

竊以自

古招智能之士因使為侍從之臣豈特賴其虛名謂能  
華國蓋將收其實用相與致君矧號令文章之為艱而  
討論潤色之所寄苟失職不稱則為時起羞伏惟皇帝  
陛下躬上聖之資撫久安之運趨時有救急之弊守器  
有持盈之難當得俊良使陪遺忘則典司明命出入禁  
門一有瘵官尤為累上臣羈單賤士樸鄙常人仕初有

志于養親學遂不專于為己比更煩使稍竊謬恩內懷  
尸祿之慙仰負食功之意又蒙採擢以至超躋蓋君之  
視臣不使同犬馬之賤則下之報上亦欲致岡陵之崇  
況臣少習藝文粗知名教遭逢一旦度越衆人唯當盡  
節於明時豈敢尚懷于私計

謝除知制誥表

歐陽永叔

伏以王者尊居萬民之上而誠意能與下通奄有四海  
之大而惠澤得以徧及者得非號令誥詔發揮而已哉



然其為言也質而無文則不足以行遠而昭聖謨麗而  
不典則不足以示後而為世法居是職者古難其人乃  
以愚臣而當此選中謝伏惟皇帝陛下茂仁聖之姿荷  
祖宗之業日謹一日曾未少懈而羌夷負固邊鄙用師  
勤儉率先于聖躬焦勞常見于顏色雖有憂民之志而  
億姓未蘇雖有欲治之心而羣情未副故每進一善則  
未嘗不欲勸天下之能每官一賢則未始不欲盡人才  
之用雖以爵祿而砥礪尚須訓戒之丁寧尤假能言以

諭至意可稱是者不又難歟伏念臣雖以儒術進司本  
無辭藝可取徒值向者時文之弊偶能獨守好古之勤  
志欲去于雕華文反成于朴鄙本懼不適當世之用敢  
期自結聖主之知陛下獎之特深用之太過此臣所以  
懇辭三四至于詞窮而天意不回寵命難止尚慮頑然  
之未諭更加使者以臨門思出非常理難屢瀆及俯而  
受命伏讀訓詞則必有能復古之言然後益知所責之  
重夙夜惶惑未知所措又況文字之職廁于侍從之班

在於周行是為超擢不徒揮翰以為劾自當礪節以報  
恩惟所使之期于盡瘁

謝除翰林學士表

張全真

旬閑避劇既叨碧落之林捨短用長復冒承明之直接  
俊遊之翰墨動榮觀于紳緹寵不獲辭覲無所寄

中謝

竊以發施大號出于絲綸鼓動多方孚若卜筮雖險阻  
艱難之日資討論潤色之工視草而報淮南之書上增  
嚴于國體扶杖而聽山東之詔下期合於人心如臣性

蔽諛聞道未深造詩書托業初有意于壯行章句決科  
老自慙于少作適逢辰之尚武殆絕筆於搗文方須長  
劍之銛鋒安取毛錐之末媿乏黃鍾之雅奏遽容瓦釜  
之鳴頌詔綽之便蕃躋禁林之密勿顧囊書羽檄未清  
郊壘之驚塵而蓮燭錦袍猶想鑿坡之盛事叨蒙至此  
報稱未知此蓋伏遇皇帝陛下堯舜性仁禹湯罪已考  
圖數貢體天心全賦之仁任賢使能啟王室中興之  
運憐臣託傾搖之孤跡終賜保全察臣無左右之先容

每垂親擢躡登鰲禁仰玷龍光謹當緝散斲之陳言紬  
廢忘之舊學曲留朝宁已銘正人端士之褒助發德音  
期感悍卒武夫之涕誓殫千慮圖報萬分

謝除翰林學士表

王履道

烏臺代匱初塵執法之班鰲禁升華遽冒搗文之選迂  
使軺而錫命嗟里巷以縱觀祇荷寵榮唯知震灼伏念  
臣學專守已進冒干時窮年隱約之中畢願棲遲之末  
支離其德早以供世用之難追琢其章晚或誤天光之

被逮蒙簡拔即獲對揚首親日月之清明謂有山河之  
懃直風揚未遠欲隨鵬翼之高神化猶潛不覺鼠肝之大  
竊顧非常之遇漸隣可畏之途典訓誥者期年心已勞  
而氣索司紀綱者三月力不逮而神疲矧茲內務之繁  
蓋極儒臣之盛不辭而受旁虞有識多士之譏自恕以  
居殆非每慕古人之意獨厚生成之賜重懃因任之求  
伏遇皇帝陛下兼受以臨百工虛懷而觀衆智裁者植  
者各隨物性之宜鼓之舞之並入天機之妙乃垂眷于

單老之際俾收跡于嚴近之游仰鴻造之不貲捐微生而莫報試之一再已知翰墨之無竒惠以初終或覲田廬之可遂

謝除翰林學士表

王介甫

臣聞人臣之事主患在不知學術而居寵有冒昧之心人主之畜臣患在不察名實而聽言無惻怛之意此有天下國家者所以難于任使而有道德者亦所以難於進取也學士職親地要而以討論諷譏為官非夫遠足

以知先王近足以見當世忠厚篤實廉恥之操足以咨  
諏而不疑草創潤色文章之才足以付託而無負則在  
此位為無以稱如臣不肖涉道未優初無犖犖過人之  
才徒有區區自守之善以至將順建明之大體則或踈  
濶淺陋而不知加以憂傷疾病久棄里閭詞命之習蕪  
廢積年黽勉一州已為忝冒禁林之選豈所堪任伏惟  
皇帝陛下躬聖德承聖緒于群臣賢不肖已知考慎而  
予言也又能虛已以聽之故聰明睿知神武之實已見



于行事日月未久而天下翹首企踵以望唐虞成周之  
太平臣于此時實被收召所以許國義當如何敢不磨  
礪淬濯已衰之心紬繹溫尋久廢之學上以備顧問之  
所及下以供職司之所守臣無任

謝除翰林學士表

蘇子瞻

名微不稱寵至若驚伏念臣經術空疎吏能短淺少年  
自守無用于作新去國生還適逢于求舊初何云補遽  
辱甄拔此蓋伏遇皇帝陛下文武生知聰明天縱法乾

坤之廣運體日月之照微過採虛名使陳薄技敢不激  
昂晚節砥礪初心雖洪造之難酬盡微生而後已

謝除翰林學士表

汪彥章

非才冒寵久誇文石之班優詔傳恩趣上玉堂之直既  
假朝章之煥仍分御府之珍遜避莫從叨塵為懼

中謝

伏以文章雖本一技命令實行四方故自古禁闈之際  
極當時儒者之選矧今多事尤重他官內敷帝制之坦  
明外應軍書之警急學非宏博難酬刻燭之咨思或淹

遲將誤掣鈴之召當得英傑來承燕間如臣者猥以諸  
生起于遐裔首尾策名之二紀中間不調者十年會真  
人光復之初陪列駿奔之後驟膺東拔徧歷高華既時  
巡清蹕之屢移方驛召群英之未至執鞭在道視草無  
人姑從東省之聯兼候北門之對嘗因多病不勝犬馬  
之心願賜寬恩任逐桑榆之暖孰云代匱遠使為真茲蓋  
伏遇皇帝陛下志靖華夷憂深宵旰勵精于學每求稽  
古之臣罪已以言欲致銷兵之福治難得要人豈當材

臣敢不仰佩春知力思補報絲綸行遠顧奚俟于丹青  
海岳精微或有資于塵露

鎖闥

謝除門下侍郎表

晁无咎

驟膺中旨政貳東臺任已重而不勝請徒堅而急避感  
深榮寵媿極迂疎中謝伏念臣素乏賢勞早塵柄用思  
一介之賤而得志若是顧歷年于茲而報國缺然是以  
進常內竭于見聞退亦不遑于夙夜昔日知爾則何以

空懷盛旦之難逢安有為事而無功方愧中才之不足  
已憂冒昧更俾進遷而況黃閤一二司之崇侍郎左右  
相之亞猥當謀大滋覺人微此蓋伏遇皇帝陛下付物  
以能使臣有禮稽法上古無貳法于後王取才當今不  
借才于異代股肱所寄負乘為憂誓殫積日之勤終覩  
太平之美

謝除門下侍郎表

司馬溫公

母慈臨御嗣聖亮陰登進弼臣眷求舊物才非稱任辭

不獲從

中謝

伏念臣出自諸生幸承素業守泥古之樸

學乏經世之遠猷逮事仁皇備員諫省容逆鱗之愚直  
無補衮之嘉謀會英祖之纂承進龍圖之近密最膺異  
禮深亮孤忠及先皇即政之初被內相代言之命委司  
天憲擢貳樞鈞終獲遂于懇辭蓋曲成于志守而臣涓  
埃罔效精力早衰出守無能分臺得請留連祠館荏苒  
歲華不圖仙駕之升永絕清光之望伏遇皇帝陛下丕  
承洪緒寅御中區訪落之謀亟先于羣辟賜環之詔屢

出于中宸起於林壑之中處以廟堂之上矧今如初政  
事綏靖邦家四方翹首以向風萬姓傾心而聽上斯乃  
君臣儆懼之日宗社安危之機必得非常之才以濟維  
新之治臣避命弗獲居寵為憂謹當承元首之明勉竭  
股肱之力庶圖薄效仰戴鴻私

謝除門下侍郎表

蘇子由

黃閭之崇惟賢是用四品之貴匪功弗加自慙迂拙之  
餘併荷寵光之及中謝伏惟太皇太后陛下政由家出

欽定四庫全書

王百家補考大全文粹  
卷四上

七

德與性成盡心與民雖萬鍾無愛於國潔身由義雖一毫未嘗取人惟至清故大臣小吏不察而盡知惟至公故貴戚近習不戒而自飭臣每因雙日獲覲清光嘗恐病竊不中于規模固陋難逃于冰鑒方欲仰干聰聽少避衆賢敢謂未見瑕疵尚加進擢豈以其拙直無欺固之過而遲鈍少狂躁之心致此誤恩濫于末品此蓋伏遇太皇太后陛下人非求備志在養賢將欲因鮑以致管生尊隗以招樂毅奮中宵而起舞晞擊楫之名流夢



魂先逸于勾陳精爽已棲于交戟其如蹇薄難復進趨  
目昏交困于視瞻足弱實妨于拜跪身非已有豈懷枕  
席之思事與心違空結望雲之戀丹忱徒積洪造難酬

五百家播芳大全文粹卷四上

欽定四庫全書

五百家播芳大全文粹卷四中

宋 魏齊賢

葉 棻同輯

謝表

中司

謝除御史中丞表

蘇子由

視草禁中既極儒臣之選專席朝右復膺中谷之求兼

延閣之寵名增南司之榮觀退循淺拙徒積兢危

中謝

伏以仁聖在宥五年于今恭儉無為四方稱治然而矯枉之過苛吏適去而寬弛相尋革故之難敝事雖除而條網尚棄民貧未可經遠吏窳難以責功是謂守成之難宜有勵精之實幸臺綱之一舉措國是于無疑如臣才力之微勉強何及此蓋伏遇太皇太后陛下德惟主善政貴日新閔風俗之情媮審詞說之忠佞知逆耳之利行察遜志之多非是以度越衆賢收掇微賤然臣

迂愚之質砥礪莫加顛沛之餘衰罷日甚言之無補昔  
已效于諫垣文不適時比復塵于翰苑恩深莫塞才短  
奚為惟有事君之小心每欲終身于直道折而不屈蓋  
蓬蒿之自然晦而猶明亦鷄鵠之常性志效捐軀之報  
未知受命之辰拜伏在廷俯仰增愧

謝除御史中丞表

黃魯直

耳目之官紀綱所寄得人則百僚用憲舉枉則庶職不  
凝豈圖眷求猥及孱朽中謝伏念臣師心孤陋賦性朴

愚宣力三朝螻蟻之心未報親逢二聖犬馬之齒既衰  
智已虧而見事遲才已拙而于用少補皂衣之缺空懸  
折檻之忠拜青鎖之門未有回天之力執銓衡無山濤  
之識侍帷幄無史魚之風忽被除書進丞執法方虞官  
謗更益寵驚此蓋伏遇皇帝陛下淵默以行四時文明  
以首萬物有知人不蔽之福有念功無疆之休憐其後  
凋收置近列惟是言責實難人才黑白分明仰恃聖心  
之虛靜米鹽細碎敢塵天聽之崇高雖自誓言終憂隕

越

謝除御史中丞表

張全真

代言西掖未施翰墨之勞執法南臺復叨耳目之寄已  
試無狀拜恩有加中謝臣聞國敗由于官邪必借重于  
紀綱之地主聖然後臣直故樂聞于藥石之規茲明辟反  
正之初當寶祚阨危之際要使奸邪不起凜如猛獸之在  
山愉悅無疑沛若巨魚之縱壑庶拾遺而補過或揀弊  
而扶衰如臣性甚慙而不移技易窮而寡偶早從吏役

久已弊于精神晚綴朝紳老不堪于憂患因緣遭遇冒昧獎知踐兩省之近班曾乏論思之盛更三院之要任但增仇怨之多倘非假寵于蓋容何以分憂于宵旰此蓋伏遇皇帝陛下神明經緯聖武布昭任賢使能以圖中興廣覽兼聽以通群下鼎新庶政方瞻洗日之光咸受衆長俾盡回天之力致滋么麼亦有叨踰戒虛美之薰心敢覲容容之福利忠言之逆耳尚幾諤諤之昌或有效于萬分誓不辭于九殞



謝除御史中丞表

王龜齡

備員左省初無論駁之勞承之中司更誤選掄之要據  
非其任愧溢于顏中謝臣聞朝廷清明百僚咸脩職業  
海宇又謐萬事皆守科條然豐亨當尚大之時顧既濟  
思豫防之策下情弗壅言路宏開責之雄俊之官列在  
紀綱之地訓詞申勅辨忠良姦佞之朋治道相關考理  
義憲章之正必求智敏宜有箴規如臣者齷齪腐儒侵  
尋晚節驟塵禁從每出淵衷衰病內乘願投閑而未獲

寵光曲被俾執法以何堪退自省循彌增震悸茲蓋伏  
遇皇帝陛下乾剛獨運離照溥臨御臣得驅策之方操  
術無膠柱之弊凡蒙驅使悉荷簡知臣敢不剖心析肝  
絕猜防于謗鑠明目張膽庶無負于猷為一言幸收百  
謫寧避

承轄

謝除尚書左丞表

歐陽永叔

大慶均行霧流而甚渥鴻恩曲被俯俸以無容中謝伏

念臣性質迂愚器能淺陋言不足以備典謨之奧學不  
足以通治亂之原徒以早荷兩朝之誤知拔自孤生而  
獎用疲駑雖勉訖無補于毫分歲月屢遷尤坐會于寵  
祿方懼黜幽之典敢布冒進之榮此蓋伏遇皇帝陛下  
光紹寶圖惟新聖政繼離明而大照推乾施以無偏致  
此妄庸首霑渙汗臣敢不退思警懼益勵衰疲感風雲  
際會之難依日月光華之末少圖後效冀盡夙心

謝除尚書右承表

蘇子由

渙汗之恩已行而不反傴僂之志雖勤而莫伸上媿鴻  
私下慙公議中謝恭惟皇帝陛下接堯舜之統蹈成康  
之仁體貌先正耆老之臣揀拔後來翹秀之士俯仰六  
載前後幾人坦然公明故不私賢否之實穆然淵默  
故坐照情偽之真臨御久則鑒愈明得失分則下無隱  
如臣者西南賤士章句小儒早歲猖狂偶叨多聞之選  
中年流落既安縣尹之卑遭時乏人致位近侍跌宕文  
墨之圃嘒嘒議論之場舉皆空言安有實效顧惟省轄

之重實叅國論之餘豈無遺賢遽及微品地寒資淺何以望三事之餘光才短力疲安能裁六聯之滯論雖復黽俛就職愧歎何言此蓋伏遇皇帝陛下天地之仁曲成草木之陋父母之愛不錄子弟之非將建大廈以覆羣生收衆材而無棄物然臣負過其力受非所容惟有潔已無私或不孤于託付引類自助幸得免于顛躋不渝始終少答恩造

加職

謝除資政殿大學士表

張全真

心勞政拙宜在譴訶德厚恩深猥叨擢序採居官之薄  
效陞秘殿之隆名荐控忱辭莫回聰聽終覩顏以虛受  
但刻骨以知歸中謝竊以學士之有大名儒臣之最高  
選景德創制示舊弼之殊榮康定限員見先朝之慎簡  
如臣質衰蒲柳景迫桑榆無牧民御衆之才第知不擾  
有愛君憂國之意其實甚踈蔑然橫草之勞行矣及瓜  
而代曩聞警急莫效馳驅敵在目中制勝愧伏波之畧

錢流地上理財謝劉晏之謀僅知謹于官常期不違于德意敢圖簡睦遽沐褒遷茲蓋伏遇皇帝陛下厲精以圖中興廣覽以收衆智謂蠻夷未免于猾夏每勤勸功故名器有時而假人靡嫌從予遂令駑質亦玷龍光仰睿訓之過優體聖心之所屬循名責實未知塵露之酬居寵思危第謹淵冰之戒無任

謝除資政殿大學士表

錢叅政

解繁機而宅牧重媿罔功聯秘殿以升班更叨申命弗

俞遜牘亟下贊書席寵過隆撫躬知懼伏念某起家平  
素涉世艱勤本乏材能已絕進身之望粗安義命敢萌  
過分之求初無左右之容忽奉清閑之對服在朝紳之  
末名豈登聞遽承帝席之前語將試用且暮獲千年之  
遇春秋閱一紀之周力雖竭而常憂任重之不勝心雖  
勞而惟恐計短之不逮自虞瘵曠辜此鑒知豈意超遷  
亟加柄用佐事樞則莫贊廟謨之大叅國論則何裨聖  
智之明驚歲首之頻更荷天心之善貸因遂退休之請



爰推進職之恩謂其身歷于政塗特爾名加于規殿滿  
盈惕戒懇避矜從歸未定而已促于蕃宣秩未終而復  
移于留任君之待臣者可謂至矣臣之報上者其將若  
何唯有懼心凜凜淵冰之側但知勤事惓惓夙夜之間  
分所當然功于何有兩郡未殫于駑力三年再被于龍  
光職司宮鑰之嚴常親地禁名隸雲霄之表不遠天臨  
夢平生而未嘗寵微躬而特厚施均內外眷備始終入  
輔出藩曾莫酌于毫髮昔辭今受徒有愧于心願伏遇

皇帝陛下精鑒臣隣博觀海宇謂分銅虎之寄均民社  
之不輕而剖玉麟之符在事權而尤重矧曾叅于近密  
終令綴于遠清頒一札以示私使十連而增耀某敢不  
俯思職守仰體眷懷塵露甚微因何資于海岳桑榆已  
晚終圖報于乾坤

謝除資政殿大學士表

毛伯穎

護羣帥于遠方曾微善最冠諸儒于中禁載錫隆名循  
牆雖切于固辭出綈難回于成命覲顏冒寵淪骨銜思

中謝竊以秦隴繹駸岷梁疲敝宿師屯而捍寇取民產以給軍非卒乘輯和則何以推勅虜之鋒非里閭安妥則何以供輿師之役而臣備員牧守授任兵民謂峙乃糗糧雖著魯侯之誓而為之保障孰先尹鐸之寬徒自竭其股肱覲不傷其基本曾無見効曷稱褒揚此蓋伏遇皇帝陛下肅將天威勤恤民隱削平區宇將大啟于帝圖懷保黎元每不忘于邦本謂臣頗堅素守久待清光粗供餽餉之期不失袴襦之惠特推醲賞以勵微勞

臣敢不自勉衰疲少圖補報整軍經武豈惟德裕之雄  
邊和衆豐財遠稽諸葛之善政少補中興之功業終諧  
歸老之田園

謝除資政殿大學士表

王介甫

秘殿升華名城優重寵靈溢分愧懼交懷中謝竊念臣  
世系單平天姿滯固親逢大雅之會首玷秀廉之科黽  
勉在公優游過紀被蒙眷與度越等夷省寺備官禁庭  
充位分無可採懼抵冒于憲章寸有所長使俾參于治

政朴忠自信智慮罕通未盡將明之誠已干呵謫之典  
至寬之度橫貸其誅褫夫左右之聯寄以東南之屏敗  
財傷錦宜有衆多之譏增秩賜金本非平素之望敢圖  
上聖復眷孤臣就徙通班改司善部惟汝陽之善壤乃  
魯服之大邦豈緊薄材稱是煩使此蓋伏遇皇帝陛下  
遇臣之道於遠不忘燭物之明雖微必逮追惟踦履之  
舊特借叢雲之休竊自揣循將安報稱臣敢不激昂志  
尚練悉政經宣布詔條之寬綏安風俗之厚庶幾一得

亡補萬分

謝除端明殿學士兼侍讀表

蘇子瞻

衰年自引久抱此心異數并加實為非意辭不獲命愧

何以堪中謝竊惟以殿命官本緣麟趾之舊因時修廢

近正金華之名歷代所榮於今為甚自元豐之末官制

以來若非身兼數器之人未有名冠兩職之重而況秩

宗之任邦禮是司豈臣迂愚所當兼領茲蓋伏遇太皇

太后陛下憂深社稷慮極安危求忠臣於愚直之中論

治道于文字之外知臣難進而易退或非患失之鄙夫  
故授以禮樂清閑之司使專于論說琢磨之事此恩難  
報願輸歲月之勤度已所宜終遂江湖之請

謝除端明殿學士兼侍讀表

蘇子瞻

備員西學已愧空疎易職東班尤驚忝冒遂領宗卿之  
事併為儒者之榮中謝始臣之學也以適用為本而恥  
空言故其仕也以及民為心而慙尸祿乃者屢請治郡  
兼乞守邊欲及殘年少施實效而有志莫遂負愧何言

今乃以文字為官常語言為職業下無所見其能否上無所考其幽明循省初心有覩面目故于拜恩之日少陳有益之言孔子曰一言可以興邦而孟子曰一正君而天下定昔漢文帝悅張釋之長者之言則以德化民輔成刑措之功而孝景帝入晁錯數術之語則以智馭物馴致七國之禍乃知為國安危之本祇在聽言得失之間恭惟皇帝陛下即位以來學如不及問道八年寒暑不廢講讀之官談王而不談霸言義而不言利八年



之間指陳文理何啻千萬雖然不同然其要不出六事  
一曰慈二曰儉三曰勤四曰慎五曰誠六曰明慈者謂  
好生惡殺不喜兵刑儉者謂約已省費不傷民財勤者  
謂躬親庶政不邇聲色慎者謂畏天法祖不輕人言誠  
者謂推心待下不用智數明者謂專信君子不雜小人  
此六者皆先王之陳迹老生之常談言無新奇人所易  
忽譬之飲膳則為穀米羊豕雖非異味而有益于人譬  
之藥石則為耆朮參朮雖無近效而有益于命若陛下

信受此言如御飲膳如服藥石則天人自應福祿難量而臣等所學先王之道亦不為無補于世若陛下聽而不受受而不信信而不行如聞春禽之聲秋虫之鳴過耳而已則臣等雖以三尺之喙日誦五車之書反不如暨卜執技之流簿書奔走之吏其為尸素死有餘誅伏願陛下覽臣言少留聖意天下幸甚

謝除右文殿修撰表

汪彥章

入對治朝方上甘泉之計進聯書殿遽先延閣之英積

此超踰若為報稱中謝伏念臣一將使指三歷歲時徒

殫犬馬之勤無補涓埃之數有功見知則悅姑幸使令  
投閑乃分之宜敢圖褒叙忽被雲天之澤擢叅奎壁之  
躋冒九等之崇資佩一時之新渥遷非以次命出于中  
茲蓋伏遇皇帝陛下道本曲成治惟公聽謂勤于夙夜  
雖皆享上之忠非隨以賞刑孰謂知人之哲比方歸報  
已辱甄收仍反故棲俾收來效入預懷鉛之表著歸增  
乘傳之光輝臣敢不祇服詞訓茂宣德意益加緣飾不

專俗吏之所為永誓廉捐庶幾古人之大節

謝除龍圖閣學士表

蘇子瞻

中禁寶儲上應奎壁之象先朝謨訓遠同河洛之符隸  
職其間省躬非據

中謝

伏念臣學非有得愚至不移雖

叨過實之名卒無適用之器少時妄意蓋嘗有志于事  
功晚歲積憂但欲歸安于田畝屬聖明之履運荷識拔  
之非常有冀桑榆之收遽迫犬馬之疾力求閑散庶免  
顛濟豈謂皇帝陛下聖度包荒天慈委照察其才有所

短不欲強置之禁嚴知其進不由人故特保全其終始  
遂加此職以責其行臣敢不仰緣末光益勵素守往何  
之而不可中無媿之為安但未死亡必期報塞

謝除龍圖閣直學士表

汪彥章

鋒車趣召記甘泉法從之餘芝檢疏榮陞延閣清班之  
首恩光曲被感涕交流中謝伏念臣頃以疾辭安于外  
補剖符方面兩膺南國之除持囊禁嚴四玷西清之選  
自守粉榆之壤屢驚蒲柳之秋身留閩徼之山川夢寄

長安之鐘鼓所憂餘日莫陪鳴玉之班何意中天忽降  
賜環之命奔馳上道展轉逾時曾未對于清閑已亟蒙  
于褒叙賜之華秩寵以神毫豈伊蹉跎之微蹤堪此蕃  
宣之異數茲蓋伏遇皇帝陛下天臨萬物子視群臣憐  
孤生去國之七年抱衰疾守蕃于萬里靡因人譽召季  
孟于河東因受帝釐見賈生于宣室特假河圖之峻用  
為州紘之榮豈惟示眷于始終蓋欲均勞于中外臣敢  
不益堅晚節無愧初心雖宿疾未除難以筋骸之勉強

然大恩必報誓于肝膽之糜捐

謝除敷文閣直學士表

洪景伯

宣布中和方歌盛德之事擢列侍從遽復敷文之階德雖自于合宮恩實顯于黼座幸逾望表懼溢情涯臣中

謝伏念臣一洿周行三陪近著莫之致而致者盡出聖明非所據而據焉卒孤簡注老之既至時不重來正浮食以太優更叨名而特異過能自訟孰云白璧之無瑕寵至若驚不失青氈之舊物身在江湖之上班聯臺閣之

中人以為榮臣獨知媿茲蓋伏遇皇帝陛下照臨若日  
溥博如天賞以馭威煥治功之綜核祭則受福章宗祀  
之光輝曾是寒蹤曲蒙私覆臣敢不深惟玷缺益務激  
昂臭腐復化神奇念隆知之未報貧賤常思富貴願再  
命以難勝

謝除龍圖直學士表

汪彥章

論思無補席寵過優蒙內史之替書預西清之更直載  
循僥冒采積兢危中謝竊惟祖宗謨訓之藏上憲奎壁



圖書之象敞禁楹而並峙命儒學以逸居矧接鴛鴻之  
游尤高龍馬之選法從假之而出守書生得此以為榮  
夫豈孱庸所能堪副此蓋伏遇皇帝陛下聰明稽古寅  
畏奉天見賢而拔其尤每兼收于群策撥亂而反之正  
分方面之顧憂雖遠清光實繫全度重高明之地悵已  
負于明恩踐文石之班敢遽忘于雅意

謝除顯謨閣學士表

汪彥章

蒐求載籍僅輸掌教之勞越進通班益玷承明之選蒙

隆私之荐及懼小己之難勝中謝伏念臣少而嗜書老而憂國念廣記備言之所載雖諸侯小國以尤傳豈承萬世之丕基乃缺一朝之信史因露章而有請蒙給札以兼收周旋雖閱于七期綴緝敢忘於一日多識漢事徒竊慕于蔡邕續承晉書顧讓推于陳壽豈意奏篇之瀆遽叨增秩之榮此蓋伏遇皇帝陛下繼體守文奉先思孝即皇皇追慕望鼎湖弓劍之還宜汲汲纂脩求石室圖書之備明詔周詢于海內遺編悉上于史官方傳

見聞一折凡例而臣夙蒙驅委適就編摩固難追補于  
螭頭幸日獲臻于麟趾爰冒塵于乙夜俄超擢于西清  
仍許乃僚亦同茲賞臣敢不誓殫樸學仰稱明恩周  
穆王之詩庶無慙于子草上段太尉之事當更採于宗  
元

謝除徽猷閣待制表

蘇叔黨

起于琳館付以名邦復玷除書荐膺謀帥寵以禁嚴之  
職俾增方面之崇誤恩曲加撫躬知愧中謝伏以陳力

就列臣子所以委質而事君為官擇人朝廷蓋將厲世而磨鈍自昔祖宗之故事必由侍從而進升況內閣之華資待天下之名士掌星躔之寶訓近日月之清光豈特縉紳之榮實高儒學之選而臣賦材鄙野備問空虛福盈每懼于災生器小不堪于大用弟兄持素媿先後于一門銅竹請符蓋屢窮于五枝獨荷凋衷之春辱收閑廢之餘雨露所加乾坤莫報此蓋伏遇皇帝陛下聖神廣運睿智有臨法天地之自然一道德而同俗長轡

遠馭操爵祿以興事功左戚右賢惜名器而彰淑慝察  
臣乏先容于左右知臣常盡瘁于使令致此恩榮下及  
孱陋臣敢不策其驚蹇但永堅于一心志在糜捐庶用  
酬于千載

謝除秘閣修撰表

張敬夫

臣某言先在廣西任日伏蒙聖恩除臣秘閣修撰尋具  
辭免奉聖旨不允已祇受告命者奉藩何補坐費三年  
進律之褒乃蒙再命控忱辭而莫獲拊小已以增羞中

謝伏念臣鈍質無堪孤蹤難植備保鄣于遠服凜危懼之百懷惟仰恃于聖明勉自殫其心力班超之策但守于平平陽城之書固甘于下下豈期睿獎荐賜寵光俯矜塵釜之餘生俾隸蓬萊之高選超踰若此報稱謂何此蓋伏遇皇帝陛下器使羣材光被四表顧未忘于簪履之舊尚念黜愚將示勸于牧圉之臣姑從隗始榮踰華袞愧甚循牆臣敢不勉務朴忠仰承德意始終一節期不負于素懷驅馳四方敢或憚于煩使

謝除直秘閣表

晁之道

聖心念功曲軫累朝之故老德澤延世亟忝內閣之華  
資遺烈載明危心增懼中謝伏念臣賦才甚下涉學未  
優備聞忠孝之風粗識君親之義每竭臣節以明父勲  
甘九死而不辭幸一言之能感蓋以先臣之遭遇積勤  
勞于皇家共惟烈祖之眷懷實度越于羣辟昔事仁祖  
再登宰衡既成河朔康濟之功復啟至和援立之策左  
右英廟翼戴裕陵蓄德弗言遭時乃顯於赫元豐之詔

大明嘉祐之勲位冠公卿名先彛鼎賡歌未遠奎畫具  
存肆蒙上聖之哀憐盡滌曩時之過咎追還恩渥備載  
策書存愍衰宗最為零替俯矜愚息特俾褒陞矧圖籍  
之所藏寔英俊之攸處豈容陋品亦玷優除此蓋伏遇  
皇帝陛下睿智日昭聖謨天運制作之效不日有成太  
平之功視古無愧謂方今之多士悉已招延惟在昔之  
宗臣豈忘褒顯固間存歿均被寵靈臣敢不勉激懦衷  
力遵先訓懷顯親之義已獲發其幽光輸報上之忠惟



有殫于死節

謝除直秘閣兼賞賜表

呂伯恭

右臣今月四日承中使李裕文宣諭聖旨所編文海精  
當賜銀絹三百疋兩者奏篇無取錫命有加既叨中秘  
清切之隆復拜內府便蕃之賜人微思厚感極涕零此  
蓋伏遇皇帝陛下聖學高明皇猷淵懿粲然衆作思採  
撫以無遺叢爾小臣懼討論之不稱已兆罪戾仍被眷  
私抱慙懷鉛曷副右文之意賜金增秩徒慙稽古之

榮

謝除待制表

王龜齡

臣某言某年某月某日進奏院遞到誥一道伏蒙聖恩特授朝奉大夫充龍圖閣待制依舊知池州臣已于當日祇受謝恩訖識慮蠢愚固甘遠斥恩慈博厚猶假小麾第深循省之思豈有甄收之望明綸下逮感涕交流中謝伏念臣幼知書晚方入仕雖嗣為表之業頗慙畫餅之名挾槩磨鉛時枕籍于圖史含香珥筆每步趨

于省臺誤被簡知荐加馳策僅同駑馬之十駕生致力  
殫未效饑鷹之一呼居然氣索扶衰上道弔影自憐竭  
來江湖之濱亦當民社之寄目昏曾詎堪從事于簿  
書臂病拘行願乞身于田里遽頒宸翰俾復從官在  
聖度之兼容何孤忠之可覲茲蓋伏遇皇帝陛下堯仁  
舜孝禹儉湯寬紹述法度而成適厥中任用人材而各  
安其職憫茲孱陋示勿棄遺延閣通班幸列西清之嚴  
近左符有守敢嗟南國之滯留終誓靡捐仰酬覆冒

謝除男正言待制表

王介甫

孚號明恩實由中出美官要職勿以次加知榮擢之及

私顧僭差而累國雲天在望冰炭交懷

中謝

臣出于羈

窮好是拙直道常違俗宜芻狗之致妖才不逮人何藿

蠲之能化陛下收之末路付以繁機距滔天之衆讒責

經世之來效施及賤息度越稠人延登朝行使嗣講業

方仰陪于膝席俄中廢于骨瘍雖進趨之禮久妨而問

勞之恩狎至莫知報稱但負兢慙豈意眷憐更予超擢


待制之為職以陪侍禁嚴正言之為官以諫救遺失承  
金華之舊學親玉色于燕朝併叨殊私甚駭羣聽此蓋  
伏遇皇帝陛下攬取同智無小大之遺搜揚衆材無久  
近之間苟或不肖概嘗有聞必垂甄收以示獎勸四方  
之訓于我無競維人多士之生斯時不顯亦世永維遭  
值孰與等夷君臣以事道相求是惟希世父子以傳經  
見用鮮或同時雖愧皋陶濟美之材敢忘狐突教忠之  
義

謝進職因任表

張敬夫

內閣分華進其寓直价藩因任錫以贊書既莫遂于終  
辭凜不知夫所措臣某中謝伏念臣昨承人之來守嶺  
隅忽坐閱于兩秋亦既殫于五技所賴傍流之惠澤故  
茲少息于疲眊吏于其間謹因以免敢希誤寵何有微  
勞此蓋伏遇皇帝陛下以大有為之資行不忍人之政  
遠邇一視真傳太上之心賞罰至公悉聽國人之論惟  
臣不敏曷稱所蒙況聞前哲之言多畏居官之久非人

情狃習之為慮即已志怠忽之難防其幾弛于方寸之間  
則害及于一路之廣反復以念經營莫寧敢不履薄臨  
深益思謹于侯度庶幾積銖累寸或不玷于皇明



五百家播芳大全文粹卷四中



欽定四庫全書

集部

五百家播芳大全文粹表

四下  
五上

詳校官編修臣謝振定

助教臣常循覆勘

總校官編修臣王燕緒

校對官中書臣范 鏊

謄錄監生臣張若湘

欽定四庫全書

五百家播芳大全文粹卷四下

宋 魏齊賢

葉 榮同輯

謝表

經帷 東宮官

謝除侍講表

張敬夫

拜命中宸執經西學雖踵熙朝之故事實為儒者之至

榮莫遂懇辭惟深惕懼臣某中謝竊以剛健篤實易稱  
多識之功緝熙光明詩著仔肩之義蓋典學所以建事  
而治國始乎脩身厥惟哲王乃燭大本此蓋伏遇皇帝  
陛下德先勤儉政用中和從善若轉圜每盡謙虛之道  
臨民如御馬居懷兢業之思念六籍之格言為百王之  
要範將來鴻碩與共講論顧臣何人亦預茲選臣敢不  
朴忠自許古義是研勉殫夙夜之誠庶幾千慮倘有涓  
埃之補少答天恩臣無任

謝除侍讀表

蘇子瞻

叨承新命祇服訓詞薄技已窮舊恩未替

中謝伏念臣

志大而才短論迂而性剛以自用不回之心處衆人必  
爭之地不早退縮安能保全是以三年翰墨之林屢遭  
飛語再歲江湖之上粗免煩言豈此身愚智之殊蓋所  
居閑劇之致臣之自處何者為宜而況講讀之司帷幄  
最近分章摘句則何以報非常之知因事獻言則又必  
貽前日之患雖仰恃天日之照寔常負冰淵之虞恭惟

皇帝陛下大德庇民小心順帝雖天覆地載以聖不可  
知為神而日就月將以學而不厭為智曲收舊物以廣  
多聞臣敢不職思其憂本無分于中外欲報之德誓不  
易于死生

謝除侍讀表

汪彥章

視草禁嚴論經閒燕兼近侍進言之責極儒臣稽古之  
榮拜命以還俯躬而懼中謝嘗謂天縱將聖奚煩博學  
以成名王求多聞蓋欲取人而為善故自古右文之世

必留心講藝之官如臣至愚何所云補茲蓋伏遇皇帝  
陛下卓然上智濟以克勤同漢祖之英論道不忘於息  
馬笑齊侯之陋讀書見議於斷輪而臣猥以菲才膺茲  
遴選第竭簡編之素習仰承帷幄之清光海岳深崇因  
無取涓埃之細聖賢間見或不如農圃之專誓絕蔽欺  
用酬知遇

謝除翰林兼侍讀表

蘇子瞻

學術本疎老復加于蹇訥官聯逾近職專在于討論退

省其愚莫知所措中謝伏以天威咫尺顧末技以何施  
聖敬日躋豈羣臣之可望非張禹寬中之篤學無量懷  
素之懿文則何以奉天子五學之游求王人多聞之益  
如臣愚暗何與選掄此蓋伏遇皇帝陛下卓然生知輔  
以好學方高宗恭默之後正宣帝厲精之初衆論兼陳  
悉洞照其情偽陳編一覽已周知其廢興察臣衰病而無  
求庶可親近而寡過故茲拔用驟及疲駑臣敢不溫故  
知新粗辦有司之職見危致命更輸異日之忠

謝除太子賓客表

汪彥章

儲闈肇啟當收卓異之才詔綽中頌首玷高華之秩既  
預論思之秘仍叅調護之榮承命便蕃撫躬跼躄中謝  
伏以三王之教世子必用正人兩漢之詔宮僚無非碩  
學矧在賓筵之列尤為儒者之光方朝廷新曠古之儀  
俾世嫡正前星之位養德茲始求賢寔艱尚虛六傅之  
聯先遴十人之選如臣膚淺非國俊髦司典謨訓誥之  
文猶孤眷倚豈父子君臣之道能有建明弗獲固辭終



慙非據此蓋伏遇皇帝陛下紹隆邦本因任人才謂臣  
久侍禁林最為孤直知臣日承聖學粗識源流故此褒  
嘉輕于畀付入奉鼇山之直出叅學禁之遊夫何一介  
之微兼此兩閨之渥古今鮮儷中外罕傳臣敢不益懋  
嘉猷誓堅晚節密為羽翼當如園綺之賢徒事文辭敢  
效應劉之陋

封爵

謝特授儀同封舒國公表

王介甫

發號端門外覃慶賜疏恩列辟俯逮空滄舞手均歡捫

心獨幸

中謝

伏念臣久孤眷遇當即謹訶曠歲籲天尚辭

榮而未獲新恩賜國仍席寵以有加唯茲邦土之名自  
昔宦遊之壤久陶聖化非復魯僖之所懲積習仁風乃  
嘗朱邑之見愛鴻私所被朽質更榮此蓋伏遇皇帝陛  
下道冒群才彌天之所覆恩涵庶品并物之所包以登  
事備于郊宮而惠澤均于海宇故雖幽屏弗以遐遺顧  
冒昧之不貲豈糜捐之可報

謝特進封荊國公表

王介甫

宮庭嘉享推惠術以及人田里空餐濫宸恩而累國臣  
中謝伏念臣苦窳賤質卷曲散材遭值休辰登備貴器  
有未償之厚責無可錄之微勞敢冀瘵身尚叨徽數此  
蓋伏遇皇帝陛下備成熙事答四表之歡心董正治官  
建一代之明制因令疲薶與被光榮雖自誓以糜捐顧  
何醅于音幃

謝加食邑表

王介甫

顯相郊宮固宜寵獎曠居田里乃濫褒加臣

中謝

伏念

臣尚負宿疴久尸榮祿無可論之薄効有未報之隆恩  
方國明禋庶工祇載奉璋執豆旅幣獻琛具輪奔走之  
勞獨抱滯留之歎豈圖疎逖亦冒寵光此蓋伏遇皇帝  
陛下荷休駿龐斂福敷錫故雖幽屏弗以遐遺身每被  
于慈憐心敢勞于勤策

代皇子謝封延安郡王表

曾子固

祇膺詔版彌積醜顏蓋崇大于宗藩以威強于帝室豈

伊獎渥可假幼冲中謝伏念臣器非宿成材無特異徒  
歸祇于鞠育每親炙于高明欲善在身忘髣髴之至弱  
知書可學慕佔畢之相從庶由受教于童蒙覲獲成能  
于壯大敢意攬攸司之密啟循歷世之彝章寵以官儀  
體均于承弼殊其爵列秩右于公侯揣稱何堪踰涯已  
甚知隆名之難冒迫大號之既行控避莫從震惶滋集  
此益伏遇皇帝陛下心潛高厚智極精微推廣愛之仁  
以隆于父子盡大公之義以篤于君臣故舊典之當行

雖至親而莫間致茲異數猥及謏能臣敢不仰體聖懷  
勤遵慈訓省躬擇術庶不蹈于匪彛臨事知方或可收  
于近用

謝除觀察使嘉國公表

冠裳就列甫與于人倫綸綍疏恩驟膺于殊渥撫躬莫  
稱拜命知榮臣中謝伏念臣托體天支分暉寶系生育  
長養慶幸席于重闈倥侗顛蒙學未通於一藝粗習勝  
衣之拜適當可冠之年誤辱慈憐驟加褒擢廉車置使

實叅從索之華公社分封庸壯宗藩之勢雖循舊典允  
謂隆私茲蓋伏遇皇帝陛下治本親仁先幼幼受祉  
而施孫子既大本根立愛而始邦家不遺支庶故茲孱  
陋有此超踰臣敢不祗佩訓詞益脩業履有猷有守率  
惟規矩之循惟孝惟忠仰荅乾坤之造

帥座

謝除安撫表

蘇子瞻

兵民重寄本禦侮以折衝疆場久安但坐嘯而畫諾才

微祿厚恩重命輕中謝 伏念臣一去闕庭三換符竹坐  
席未煖名節已行筋力疲于往來日月逝于道路未經  
游歲復典兩曹朝廷非不用臣愚蠢自不安位所宜竄  
逐更冒寵榮此蓋伏遇皇帝陛下離明正中乾健獨運  
追述東朝之遺意收此散材眷言西學之舊臣付之善  
地致此衰朽尚未棄捐臣敢不勤卹民勞密脩邊備苟  
無大過以及期年漸還魚鳥之鄉以畢桑榆之景

謝除安撫表

宋子京



越從聞佐超摠藩垣撫綏列邦領護諸將軍符叅擁使  
綏交華恩踰望端慙結情外中謝伏念臣命兼材薄志  
與年衰自忝從官久陪經幄名崇而實難副譽就而毀  
輒隨蓋黨士護前則見排夸人艷利則相軋奔湍薄渚  
堆岍獨摧彎弓晚林孤翅先墮是以褫近職者一典守  
麾者三心餘故憂謀失新勇方將收跡華要之地乞身  
棲偃之場頡業斯文力頌聖德刻金石以垂美薄天  
壤而無慙何圖至仁過聽亡狀謂老則閱事衆是宜守

邊憂則慮事深可使從政遂付師律俾扞塞屯過闕許  
朝臨遣加秩又況當國奧壤全趙舊封地饒財賫人尚  
武功技擊躡強者三萬凌隍峭堞者六州介在山東隱  
若天限竊循孱怯有忝俞咨此蓋伏遇皇帝陛下道惟  
曲成義不偏任善護所短冀責有能內憂製錦之傷惕  
成流汗之熱再念儒者之學本勞而少功數竒之人恐  
不得所欲且言虎者三而成惑拔楊者一乃有餘釜鼎  
中隔則寸焰沸水丹雘先容則枯枿蒙器伏望陛下念

臣身遠干寡察臣徇公絕私寧無中傷必賜明辨臣亦夙夜自儆美醜必陳同士甘辛求民瘠瘼詢徵障之曲折繕器械于犀完粗脩厥官申報而國待前方阻叩臆何宣

謝除安撫表

閻蒼舒

河圖次對超陞六閣之先天漢上游申任十連之寄乾坤恩大絲髮命輕臣中謝伏念臣夙以散材濫居冗從奉身以退既絕望于明時去國而來亦濫叨于煩使遂

州城外小惠巴人韓信壇前來施秦策雖自彊其志節  
終無補于功名而福過延災且年侵嬰疾顧嵇康之多  
難懷七不堪念孔戣之已衰負二宜去方力祈于閑寂  
乃復被于寵靈奎壁文章增重西清之首山河錦繡載  
臨南鄭之區自省孱微若為報稱此蓋伏遇皇帝陛下  
天臨九有子視羣工俯憐跼履之餘無復脩門之入故  
尚加于明試示未底于棄遺顧跛羊千仞之登蓋已難  
矣況鉛刀一割而鈍其可再乎威命莫回危蹤知懼臣

敢不益扶孱力深激懦衷寶觀萬楹棲一心而灑濯金城千里効九死以糜捐於是丐歸終期得請

謝除安撫表

沈樞密

假守上游初無善狀陞華以對忽拜詔恩循牆弗獲于懇辭出綽再勤于申命幸踰望表感溢情涯臣中謝竊以聯六閣之森嚴均為清選依四松之邃密榮列從班載惟名數之優蓋獎勞能之異授之不至于濫得者真以為榮臣學術迂疎性資方拙偶值休明之運早蒙特達

之知中外踐更莫非親擢始終全護盡出春私昨從詞  
官之投閑自分勞途之絕望旋蒙軫記俾預使令起之  
田野之中付以承宣之寄永嘉一載曾乏治聲鄂渚一  
麾繼叨選任竭來庀職行且及期適承凋弊之餘幸道  
曠瘼之戾雲屯萬旅肅營壘以無譁碁布四民安井閭  
而自樂茲乃皇明之遠暨遂令德意之具孚而臣且無  
避責之嫌屬在引年之日亦既露歸休之請其敢萌僥  
進之心何期寵靈橫逮孤遠煥清廂之新秩復榮索之

舊資豈惟朽質之增華頓覺名城之改觀茲益恭遇皇  
帝陛下聰明燭于萬微而隆寬盡下威德加于九有而  
內恕及人謂老馬有辨道之能而遺簪無在原之棄有  
如鴛鴦亦被龍光臣敢不益勵素心更堅晚節桑榆已  
逼愧補報之無間溝壑未填誓糜捐而後已

謝除安撫表

潘時

海嶠守藩寂無治狀星沙謀帥遽玷除書躡升內閣之  
華增責中權之重恩深責厚感極涕零臣族系單平吏

能謫薄置身冗散而無適時應用之才遭世聖明妄有  
趨事赴功之志誤蒙差擇浸被使令自一領于州麾因  
屢叨于使節頓冒平反之寄繼分屏翰之憂地大物繁  
疲精神于歲月年侵疾至驚性命于煙嵐亟籲天而乞  
憐遽易地以疏寵乃眷三湘之都會嘗馳六轡以咨詢  
課昔日之澄清已窮末技數當年之牧守莫匪名流控  
辭幾罄于循牆成命難回于出綽此蓋伏遇皇帝陛下  
仁均覆燾明並照臨臂指四方如在行畿之近甄陶羣



史尤嚴制閫之除知臣粗歷于險難察臣匪由于虛偽  
用全枯朽改畀便安臣敢不勉策衰殘仰當委任方早  
曠軫九重之念未遂投閑使愁嘆有一飽之歡終期得  
請倘苟存于朝夕尚圖報于須臾臣無任

大尹 都督

謝除開封尹表

汪彥章

恩錫絲綸忽從中出任隆輦轂不以次遷舉萬方輻輳  
之區付一介顛愚之士身雖甚寵力恐難勝中謝伏念

臣生本寒鄉出陪多士少從師學僅知儒墨之是非長  
佩官箴安識求由之果藝徒以昔叅于儲禁斐然長奉  
于牋辭緣此孤蹤簡于聖聽逮自江湖之遠來瞻日月  
之光裁奉燕閒即蒙褒擢俾佐銓衡之任初無根柢之  
容曾未逾時復叨進秩唯三輔幅員之大萃四民囊橐  
之奸必發摘如神方勝銛筭之說苟拊循非術能無桴  
鼓之驚誰謂鯀生可當器使茲蓋伏遇皇帝陛下留情  
治術端本京師欲令張敞之春秋稍施于政故試望之

于馮翊非有所聞而臣自歷仕途未更吏治一旦任劇  
煩之寄則衆人為綿薄之憂臣敢不用恕平反以文緣  
飾為四方之極庶幾無愧于商詩從一切之宜未肯追  
蹤于漢吏

謝除都督江淮軍馬表

張德遠

賜斧專征蓋求人望揚庭孚號誰料臣愚控避無從省  
循知懼中謝伏念臣天資任已衆謂寡謀趙北燕南雖  
媿風聲之慷慨吳頭楚尾粗更牧圉之周旋無憐拊髀

之憂消自覺據鞍之已老壯心徒在綿力既憊當國家  
多士之時值神聖有為之主人思奮厲臣肯懷安所虞  
荐康瓠于鼎鼎之陳必有駕鳴鳩于霄漢之誚奪乘何  
侮辱命為憂自承制誥之頒未省聽聞之誤磨鉛策蹇  
夙夜以思食藥飲冰進退維谷茲蓋伏遇皇帝陛下臨  
朝獨斷立賢無方謂臣結髮于邊陲粗識三軍之情偽  
察臣致身于公傅必同一體之戚休起自里居俾承人  
乏臣敢不激昂晚景報稱殊知趙將軍八九十而習羌

情願罄老臣之肺腑漢天子十八萬而建武節會來屬  
國之梯航

漕使

謝除成都轉運表

唐子西

嶺表觀風已慙治効坤維按漕復玷寵靈引組知榮撫  
襟增覲中謝伏念臣單平冷系迂暗常才雖懷許國之  
孤忠非有過人之竒節偶緣冗官被遇先皇擢任監察  
猥承人之出分使指益愧食浮纔自脫于殿刑蔑可書

之最考謬膺渙渥重忝皇華鼠能已盡于五窮鉛刀何  
堪于再割鴻恩未報俄驚重鼎之成濬哲肇興尚念遺  
簪之舊遂容尸素未即棄捐此蓋伏遇皇帝陛下至健  
行天大明出震開並採兼容之路隆太平極治之基致  
此冥頑類蒙委寄粹表未瞻於天日狂私已佩于丘山  
敢不續短俾長免禍為福登車興嘆雖微孟博之才叱  
馭遂行姑勵王尊之節鎔銖可効糜捐為期

謝除轉運副使表

耿秉

拜命起家甫朝祥於東魯疏恩乘傳再日覩於長安委  
寄益隆報塞難稱中謝伏念臣愚不適用拙無所長識  
至淺而惟知勿欺學甚疎而所期不負一行作吏三十  
年奔走之勞屢試罔功十二任勲庸何有方素鞿下釋  
之始辱皇華再遣之榮精神不逮於七載之前覺馬齒  
之加長神觀未復於踰月之後知鼠技之易窮深慙衰  
朽之資曷副劇繁之任茲益伏遇皇帝陛下邁文發政  
以堯治民萬國欲得其歡心蓋天子之孝也四海務形

于廣愛雖聖人莫加焉常思天下之澄清必重關中之  
根本操心慮患爰有取于孤臣察俗觀風俾復還于舊  
觀臣敢不明目張膽竭力一心舉廉刺貪不憚煩於政  
教興利除害將孰復以條陳

提刑 茶馬

謝除提刑表

邵公濟

支郡分符已慙善政明時持節濫撫祥刑被寵以驚省  
躬知愧中謝伏念臣資惟極陋數則多竒在昔先臣再



被裹輪之召至于晚節亦叨勸駕以行國史載隱逸之名鄉書上經行之選實惟一門之盛事益出三朝之異恩獨不免于窮途悵虛逢於昭代欲遂挂冠之願未酬結綬之心豈期流俗之餘偶被使令之末惟西蜀忠厚之俗有東魯絃誦之風顧此齊民之浩穰皆自累聖之涵養山川秀麗初無犬吠之虞固固空虛不待鷄鳴之赦欲持平于邦憲宜精擇于司存豈容下才輒膺重任茲益伏遇皇帝陛下體天地之覆載並日月之照臨刑

無用于三千囚自歸于四百欲兼容于羣聽致誤採于  
虛名蓋本哀恤遠方豈獨矜憐小已推仁心以及物  
尚憐馘鯨之牛將德意以遣臣敢憚虺隤之馬臣謹當  
佩服溫厚之訓典奉行寬大之詔書聞禮傳家粗有志于  
他日引經斷獄更盡力于此時

謝除提刑表

周頡

給餉重湖深負罔功之愧總刑東浙復叨非據之勞弱  
質奚堪隆私莫報臣中謝竊以好生乃天地之大德措

刑為帝王之極功得情亦尚以哀矜治獄務先于寬恕  
惟必有勝殘去殺之善庶能全仁民愛物之心始稱選掄  
不孤任使伏念臣才非可用性本至昏且質直以無文  
惟介僻而自守捨去泮宮之閒冷不辭蜀道之艱難萬  
里東歸徒抱孤忠之憤九重兼聽未容片善之遺誤被簡  
知濫叨獎拔分符剖竹何補郡條煮海摘山曷裨國計  
嗟謬庸之無取以瘵曠而是虞豈謂遭逢亟蒙收召郎  
省積空殮之慊宰司增翫歲之羞迹微而素志迂疎身

老而舊學荒落方伸更迭之請畀以轉輸之權退念五  
載之僥逾尚之一毫之稱塞矧惟憂顧莫重平反要當  
君子之盡心庶禔有司之不犯無訟詳陳于魯訓棊彛  
備載于周書如臣之愚豈任其責茲蓋伏遇皇帝陛下  
體元而居正圖大而宅中發渙號以誕施擴離明而繼  
照開一世以自新之路涵萬物以如春之仁凡云尺寸  
之微盡入範圍之內察臣朴實而近厚知臣奔走之忘  
勞不忍棄捐曲加甄錄臣敢不奉行寬大深體訓詞更

自  
卷四下  
囹圄皆空廣聖君欽恤之意雖衣冠不盡躋斯民仁壽  
之途

謝除江東提刑表

汪彥章

蠻方久次忽蒙恩詔之頒使節內遷仍獲鄉邦之便蓋  
始望未嘗及此雖自謀何以過之人知從欲以為榮臣  
獨感恩而至泣中謝伏念臣早緣孤直叨備使令雖才  
疎屢至于顛隲然事白即蒙于超擢頃駕一朝之傳深  
行五嶺之區眷言風土之異宜嘗恐庭闈之動念既云

盡瘁敢復圖安嘗中被于褒陞亦浸忘于留滯豈期私  
計之上達不待終更而北還千里綉衣初入中原之郡  
縣雙親白髮重瞻故國之江山遂令忠孝之兩全何止  
平反之一笑仰視必恭之梓旁連聽訟之棠茲蓋伏遇  
皇帝陛下衆建人材恢張治具薄海內外而並照其智  
如神因時輕重而制宜以刑為體欲廣哀矜之意必求  
忠信之人謂臣素習于民情知臣粗安于名節特捐茲  
寵俾效厥官臣敢不奔走十城奉行三尺勤于夙夜盡

人臣欲報之心同我州問樂陛下好生之德

謝提刑落發遣字表

晁之道

遭時陳力未書可紀之勞積日計資更冒論功之寵載  
恩逾厚撫已增慙中謝伏念臣涉道未深受才甚下固

未識聖賢之所學亦粗知忠義之可為府幕郎曹被泰  
陵之知獎卿聯使寄皆陛下之選除勉自激昂乃期奮  
起雖慙駑蹇迄無實試之能但閱歲時彌有空殫之懼  
豈圖恩渥均逮頑冥此蓋伏遇皇帝陛下政本禹勤道

稽克哲衡聽以熙庶事器使而效衆材致此羈孤荐叨  
秩叙布宣德意益殫犬馬之勞趨赴事功少答乾坤之造

提舉

代謝除提舉表

汪彥章

龜勉郡丞方虞官謗阜通邦貨忿領使華蒙眷獎之過  
優撫危躬而若厲中謝伏念臣受材庸淺遭世盛明由  
詩書誤綴於末科行州縣浸成于華髮分投閒冗無復  
激昂孰云菟擇之辰亦在鞭驅之數惟山海懋遷之



利實朝廷開闔之權吏或不度法因以廢故比下丁寧之詔至重分刺舉之官宜得時髦執此如金石之固坐令國用沛然若丘山之多大懼孤蹤莫勝煩使此蓋伏遇皇帝陛下恢張治具駕馭人群察萬貨之低昂為之調度因百官之能否責以事功謂臣從事之有年疑臣理財之知要特假道途之便使趨期會之嚴臣敢不上體綸言肅驅軺傳徧行所部並大江千里之餘庶得其贏佐少府萬分之一

謝除江東提舉表

謝深甫

推行荒政繇祇奉於詔條寵被優恩遽濫陞于官簿微  
勞莫效大懼弗勝臣中謝竊以將命九重備使一道惟  
先疾苦之問以廣德意之孚矧專斂散之是司宜視凶  
穰而唯謹當大饑發大熟之蓄職思其憂無小言望小  
利之酬賞過于僭諒茲疏寵借以勸功伏念臣奮自寒  
生久安下仕頃叨賜對誤蒙宸宸之知旋沐褒遷猥廁  
廷紳之末僅再更于歲序凡三冒于親除俾以乘輅驟

玷皇華之遣及于弛擔偶惟雲漢之裁歲既不登人方告病受牛羊而與牧其責誰歸集鴻雁之于飛雖勞敢憚賑倉廩之貸予徧原隰以馳驅冀上寬焦勞之憂期下無轉徙之患幸時還定故民咸安其居賴國威靈在臣何力之有茲蓋伏遇皇帝陛下德恢天覆澤沛海涵發施政仁每必先於四者薄征散利尤用聚于萬民凋瘵既蘇豐登已兆尚念布宣之無壅曲示褒獎之有加臣敢不深省僥踰勉圖稱塞取有餘而補不足廣堯湯

備具之儲務實惠而去虛名助文景安養之政

謝除湖南學士表

胡文定

誤拜綸恩復將使指按臨舊部祇奉新書中謝命鄉里  
而賓賢能是謂成周之法謹庠序而申孝悌常聞孟子  
之言流風既遠而莫傳陳論益卑而無取聖由天縱道  
與世升州增訓秩之官路遣光華之使藻芹可采金玉  
其相適慮冗員肆頒中旨恐郡縣因文移之末暫廢司  
存念學校真平治之原亟仍舊貫再出維行之令兼收

已試之才有若庸虛居然忝冒此蓋伏遇皇帝陛下憲  
章古昔紹述熙豐永維繼志之遠猷莫急化民之先務  
人歸善養能以道親遂令疎逖之蹤同預策磨之列  
臣敢不致虛觀復克已為仁處心弗間于顯微奉法務  
張于廉恥諸儒駕說必明忠孝之大端青佩嗣音無習  
文章之小技

謝除茶馬表

楊輔

仰稽命召大懼深何俯拜俞音冒將隆措增重司存之

寄躡升寵秩之名恩踰丘山感鏤肌骨臣中謝伏念臣  
頃充員于館職首待罪于宮庠時瞻清光退竊榮遇旋  
叨郡籛即去闕庭將輸未決于成期因任海承於閩寄  
閱楚辭之雷整再閏已周相禁邏之雲深孤蹤何有肆  
壽皇之收召逮陛下之纂承在于葵藿之誠敢徇衡茅  
之志然臣數竒難偶意外多虞迫危厲之薰心控忱忱  
而瀝懇攀鱗望遠空懷捫角之思前席搔殘甘滯周南  
之迹雖駭覆舟之變實干俊駕之誅豈謂鴻私尚憐舊

物矜其涼薄借以寵光俾司蜀漢之權征兼摠羌戎之  
互市恩加進職遣視乘輅顧孱微既懼于靡任而僥倖  
則踰于始望茲蓋伏遇皇帝陛下仁天初覆聖澤旁流  
簡搜首逮于薦紳收拾不遺于墜履謂屬離明之繼照  
孰不傾心察其坎險之在前義容知止姑從煩使庸示  
曲全若其所領之官頗謂難勝之任將登積弊宜得通  
才使之冒處于衆難恐必上辜于器使飲水祇命毀瓦  
慙功臣敢不夙夜以思馳驅惟力政爾敗官而獲譴固

分所甘如其任道以求全蓋知所擇



五百家播芳大全文粹卷四下